

AKASHVANI AIZAWL

REGIONAL NEWS BULLETIN

(MIDDAY)

R-DAY

Ram Danpui hman tan ni, Republic Day vawi 77-na chu tukin khan Mizoram hmun hrang hrangah lawm a ni a, a lawmna pui ber Aizawlah chuan Lammualah Larsap Gen. Vijay Kumar Singh hova hman a ni.

Larsap hian India hnam puanzar pawtparhin parade contingent 23 te'n hnam puanzar zahna chibai an buk chu a chhanglet a.

Hemi hnu hian Republic Day puala thuchah sawiin, Mizoram mipuite chu Republic Day vawi 77-na pualin chibai a buk a, India khua leh tui zawng zawngin dikna, zalenna leh intluktlanna an lo neih theih na'n Ram Danpui chu hman a ni a ti a. Larsap chuan Mizoram Sorkar flagship programme, Mizoram Bana Kaih (Hand Holding) Scheme chuan Phase-II a thleng tawh a, mi tam takin tanpuina an dawng tawh a, Chief Minister's Special Package Grant hnuaiah pawh sum sem a ni tawh a ti a.

Mizoram tana mellung pawimawh tak, Bairabi-Sairang rel kawng thar chu India Prime Minister zahawm tak Pu Narendra Modi chuan September 13, 2025 khan hawngin, Mizoram khawpui, Aizawl kawtkaia rel rawn lut hmasa ber niin, rel rawn lut chuan zin hunchhung a ti tawi a, bungraw lakluh man a ti tlawm a, sumdawna, khualzin hip leh eizawna lamah kawng nasa takin a hawng dawn a ti a. Mizoram chu hmarchhak state zinga tourism-a thang duangber pawl a ni tih sawiin, kum 2024-2025 chhung khan Mizoramah khualzin nuai 5 chuang rawn lutin, khualzin rawn lut hi 139.5% in a pung a, kum 2025-2026 ah pawh pun belh zelin October 2025 thleng khan khualzin nuai 4 chhinchhiah tawh a ni a ti a. Tourism Department chuan Mizoram hmun hrang hrangah hmasawna ruhrel chi hrang hrang a kalpui mek tih sawiin, Art & Culture Department bultumin Zokhua, Falkawnah pipute khawsak dan leh nunphung pholanna Live Museum buatsaih a ni a. Hei hian tualchhung mite leh thalaite tana sum lakluhna hnar a siam a, zinmite'n Mizo kutchhuak an hmuha an lei theih mai bakah Mizo nihna leh hnam ziarang chawilar na'n a pawimawh hle tih a sawi a ni.

Mizoram Police chuan cheng vaibelchhe 816 vel hu ruihhlo manin, thubuai 217 an siam a, mi 338 an man a ti a. Kuhva tawlhruk cheng vaibelchhe 17.8 hu leh a inhnamhnawihte an man a. Dan lova zu zawrh thahnem tak man a ni a, thubuai 82 ziah luh niin, mi 99 man an ni a ti a. Hei bakah hian silai 42, a mu tam tham tak leh a neitute manin, thubuai an siamsak a. Cheng 500 note lem thahnem tak manin, a neitute dan anga hrem an ni bawk a ti a. Excise & Narcotics Department pawhin ruihhlo hmanga sumdawng dan bawhchhia mi 611 mana hrem, ruihhlo kg 474 dawn lai an man a, ganja chinna hmunte an tichhe bawk.



VOTERS’ DAY

Nimin khan India ram pumpuiah National Voters’ Day (NVD) hman a ni a, Mizoram district hrang hrangah pawh hman niin, hun pui ber chu SP Conference Hall, Aizawlah hman a ni a. Kumin thupui chu ‘My India, My Vote’ tih a ni.

Voter naupang zawkte ram hruaitu thlanna nasa zawka tel tura chawh phur na'n sawrkar laipui chuan January ni 25, 2011 khan Election Commission of India din ni (January ni 25, 1950) champhaphakah National Voters’ Day hi a hmang tan a. Kumin hi hman a nih vawi 16-na a ni. Aizawla NVD 2026 puala hun hmanah hian Dr. Lalrozama, Chief Electoral Officer, Mizoram chuan thu sawiin, kalkhawmte chu National Voters’ Day chibai a buk a. Voter tharte chu an vote dik taka hmang ngei turin a fuih a. Democracy a inthlan reng reng chu mipui avanga hlawhtling a ni tih sawiin, India ram democracy chuan mi chi hrang hrang inang lo tak tak a huam avangin ram hruaitu thlanna atana inrelbawlna (electoral machinery) tha neih a pawimawh a, inthlanna chu thianghlim, felfai, langtlang, mipui rinkai leh huap zo (inclusive) a ni tur a ni tih a sawi a. Hemi atan hian electoral roll dik leh thianghlim a ngaih thu leh Block Level Officer (BLO)-te pawhin mapping an kalpui mek a, za zela 87 vel zawh tawh a ni tih a sawi bawk.

He hunah hian Electoral Registration Officer (ERO) te, Assistant ERO te, Booth Level Officer (BLO) te bakah voter tharte leh sawm bik NGO, kohhran, political party-te leh chanchinbumite an tel a ni. Aizawl District Election Officer Pu Lalhriatpuia chuan inkhawm hi kaihruaiin, NVD hman tan a nih dante leh he niah hian kum 18 tling tharte’n India rama democracy chawi nun a nih zel theih na'na ram hruaitu tha an thlan theih nan awareness programme hman a nih thin thu a sawi. Pu Samuel Zodinsanga, Election Officer, Aizawl District kaihruaiin NVD Pledge lak a ni a. Kalkhawmte chuan kan rama democracy kalphung leh inthlan thianghlim, dik leh ralmuang chawinung tur leh inthlan apianga hlahna emaw inthliarna leh inenhranna hrang hrang emaw thlemna emaw inthununtir lova vote thlak turin an intiam a ni.

CEO chuan vote nei thar mi 11-te hnenah EPIC a sem a. A hnuaia district-te hnenah Best Election District Award a sem bawk a ni.



DRUG SEIZURES

Police te’n Champhai district-ah heroin kg chanve chuang leh methamphetamine kg 11 thelh an man.

Champhai district Zokhawthar Police Station a thawkte chuan Zirtawpni khan Myanmar luhna Gate hnaih Land Customs Station Building bula bungraw dahkhawmna hmunah Myanmar atanga thlai dahna bag te chu an endik a, antam dahna ip 3 chhunga thuhruk heroin ni ngeia hriat an man a. He'ng ip chhung atang hian heroin hawng 39, gram 468 a rit an man a, international market rate-a chhutin cheng nuai 93, sing 6 hu ni a chhut a ni. He tih mek lai hian zawngtah dahna ip atangin Methamphetamine kg 10.818 a rit, mum 90,900, international market rate-a

cheng vaibelchhe 1 leh nuai 40 chuang hu an man tel bawk. He'ng ruihhlo te hi a neitu hriat an ni lova, Zokhawthar Police Station ah Narcotic Drugs & Psychotropic Substances Act, 1985 tlawhchhanin thubuai ziahluh a ni a, an chhuizui zel a ni dawn a ni.

Hemi ni vek hian Champhai Police te chuan Khankawn Police Check Gate paltlang tur Maxi Cab pakhat a bag, a hnuailam siam danglam atangin heroin hawng 6, gram 68 a rit, international market rate-a cheng nuai 13 sing 6 hu an man a, ruihhlo neitua puh leh ruihhlo dahna bag neitu, Maxi Cab khalhtu ni bawk Benjamin Lalremliana, kum 38, Champhai Vengsang a cheng ni a inchhal chu an man nghal a ni a, ruihhlo tawlh leh kawl thubuai siamsak a ni.

(Lahlupuia, PTC Champhai)

